

Üna negligenza cun consequenzas cheras

In favrer ho ün ski pers u schmancho illa natüra chaschuno ün'acziun da retschercha invauna sur Zuoz ed uscheja eir cuosts e lavur evitabla. Perque cha da quellas acziuns s'hau augmantedas i'ls ultims ans ho la pulizia fat ün appel d'annunzcher ogets pers illas muntagnas.

La Rega d'eira disponibla il pü svelto. Ella ho fat il prim svoul suot il Piz Arpiglia a Zuoz ed üna retschercha spontana – e zieva surdo ün ski chatto i'l laviner a la pulizia. Quella ho fat ulterius retscherchas, ma na pudieu excluder definitivmaing ch'üna persuna d'eira gnida sepulida illa lavina. Uscheja es il di zieva gnida lantscheda üna seguonda acziun da retschercha pü rigurusa.

Auncha üna vouta sun la Rega e la Helibernina svuledas sül laviner suot il Piz Arpiglia, specialists da la pulizia alpina e dal Club Alpin Svizzer (CAS) haun cun differents mezs e cun chauns controllo intensivmaing, schi füss tuot-üna sepulida üna persuna illa lavina. Quatter svouls d'elicopter sü e giò, la mobilisaziun da numerus specialists, püssas uras lavur – invaun ed etibel.

Circunstanzas na sclaridas

Sün üna tura vaiva üna persuna scuvier ün ski i'l laviner ed alarimo il servizzan da salvamaint. Las acziuns da retschercha nun haun però purto ün-güns indizis ch'üna persuna saja gnida sepulida illa lavina.

«Tar nossa acziun da retschercha vains constatato cha'l ski es placho sül laviner pür zieva cha la lavina es gnida giò», disch Dominik Hunziker, schef da salvamaint da la sezziun Bernina dal CAS. Qualchün ho pers u lascho inavous il ski sainza ponderer che consequenzas cha quella negligenza



Üna negligenza chi ho chaschuno üna granda acziun da retschercha, Fotografia da la lavina suot il Piz Arpiglia inua chi d'eira gnieu scuvier ün ski abanduno la mited da favrer. fotografia: Pulizia chantunela

ho. «Quel u quella avess pudieu piglier cun se sieu ski sainza as metter in prieviel», constata il schef da salvamaint.

Ün'eivna zieva, als 21 favrer, alura la comunicaziun da la pulizia chantunela: «Ski sün laviner chaschuna acziun da retschercha.» Cuort e bön – sainza indicaziun da las spaisas e dals cuosts cha l'acziun ho chaschuno.

Fin hoz nu s'ho que sclarier chi chi ho chaschuno quell'acziun da retschercha evitabla. Ne tal CAS ne tar la pulizia chantunela nu s'ho annunzcheda üna

persuna pervi dal ski pers u lascho invavous.

Na la prüma vouta

«Quist es la tschinchevla vouta ch'ün oget abanduno ho chaschuno ün'acziun da retschercha i'ls ultims ans», disch Dominik Hunziker. Per quel motiv ho el eir dumando a la pulizia da fer ün appel – uscheja chi staiva illa comunicaziun eir: «La Pulizia chantunela dal Grischun dumanda a skiunzs e skiunzas da turas d'annunzcher a la pulizia, schi sun ieus a perder ogets illas muntagnas. Uscheja as po que eviter acziuns da retschercha cheras.»

Quant chera cha quella acziun da retschercha la mited da favrer d'eira, que nu's lascha eruir. «La Rega nu do cuntschaint üngünas cifras in connex cun sias acziuns da retscherchas», disch la pledera da la Rega, Karin Zahner, sün dumanda. Ed explicha cha'ls cuosts dependan ferm da las dimensiuns d'üna acziun da salvamaint. «Pü lösch ch'üna acziun düra e pü bgers mezs da retschercha e persunas chi vegnan impundieus, pü ots cha'ls cuosts sun.»

Normelmaing pejan las persunas salvedas ils cuosts da l'acziun da salvamaint – respectivmaing lur sgüraunzas. Ma schi nu's chatta ils pertuchos, pejan finelmaing las faaturas e'ls fauteurs da la Rega. Eir scha'ls cuosts exacts restan intscherts, dvainta in discurs cun persunas invoutas evidaint cha da quistas acziuns da retschercha u salvamaint chaschunan cuosts da püs millis francs, svelto eir imports cun tschinch cifras.

Annunzcher ogets pers

«A nu sun be ils cuosts e la lavur invavous», disch Dominik Hunziker. «Que resta eir adüna ün'intschertezza. Pudains propi excluder ch'ünün nun es sepulieu suot la naiv?» Üna varianta per redür l'intschertezza es d'inventariser ils ogets pers illas muntagnas. Que faun taunt il CAS scu eir la pulizia. Ma que pretenda eir la collavuraziun da quels e quellas in viedi illas muntagnas. «Que drouva eir saun inolet. Mincha fazöl da nes pers nu stu gnir annunzcho», disch il schef da salvamaint. Ma acziuns scu quella al Piz Arpiglia as pudess eviter – scha que füss sto cuntschaint a la pulizia o al CAS cha'l ski nu tuocha ad üna persuna sparida. Dominik Hunziker quinta eir d'ün simil evenimaint cur cha'l Helibernina vulava trer per incumbenza da l'UFFizi da construcziun bassa üna lavina sül Pass dal Güglia ed ho scuvier ün ski i'l laviner. «Zieva s'ho mussu: quel skis d'eira lo daspö quatter ans. Il prim sün ün grip, d'inaua ch'üna lavina l'ho piglio cun se.»

Cha la gliued es per part in gir sainza reflecter illa natüra as muossa eir, scha Dominik Hunziker quinta «ch'ün quart da las persunas annunzchedas scu sparidas sto bain. Quellas nu saun niauncha ch'ellas vegnan tscherchedas.»

Ma almain ün effet positiv ho la negligenza al Piz Arpiglia gieü. Zieva l'appel begian diversas persunas annunzcho ogets pers illas muntagnas, infurmescha la pulizia chantunela. Uscheja cha la gliesta d'ogets pers es creschida ed üna u l'otra acziun da retschercha invauna po forsia gnir evitada. Michael Steiner/fmr

An da gestiun allegraivel

Uniun dals Grischs In sanda passada ho l'Uniun dals Grischs (UdG) gieü sia radunanza generela illa sela dal Chesin Manella a Schlarigna. Temor ün rapport da la suprastanza da la UdG d'eiran preschaints 18 commembers e commembras cun dret da vuscher. La co-presidenta Victoria Mosca ho preschanto sieu rapport annuel ed ho recapitulato insemel cun la co-presidenta Gianna Duschletta l'an passo.

Intaunt cha l'an 2023 vaiva serro giò cun ün deficit extraordinari da var 28000 francs, es sto il 2024 ün an da gestiun pü allegraivel per la UdG. Quel ho a la fin serro giò cun ün guadagn da gestiun da 6323 francs. Uschè ho l'UdG traunter oter pudieu fer cul Dun da Nadel e cun la Chesa Paterna guadagns allegraivels da passa 11000 francs. La gestiun da la libreria i'l Chesin Manella percenter serra cun ün minus da passa 13200 francs. Impü ho pel 2024 eir pudieu gnir amortiso il seguond terz dals drets pel dizziunari in l'otezza da 10000

francs, cha l'UdG ho cumpro dal 2022 da Gion Tschärner. La radunanza ho approvo il rendaquint dal 2024 sainza contravuschs.

La suprastanza ho eir do ün sguard stillas activitads da l'uniun ladina chi sun planisadas per quist an. La sted es previsa üna collavuraziun cul festival da litteratura «Favella Bella» da la Chesa Planta e l'UdG sarò darcho preschainta cun maisas da cudeschs als cuors intensivs a Samedan, Scuol e Segl. In november haun lö ils Dis da Litteratura a Domat, inua cha l'UdG preschantaro il Chalender Ladin da quist an. Ed eir in november es planisada la sanda da vendita i'l Chesin Manella ed ün Poetry Slam Ladin.

Impü edescha l'UdG quist an insemel cul Parc Naziunel Svizzer il cudesch d'iffaunts «Üna gita sü Macun» da Robert Giacometti, e publiescha cun la Chesa Paterna «Ils trais ??? – Il muglin palantin» üna traducziun valladra da Patrizia Meng. (cdm/cam)



Ün bel viadi musical tras la Svizra

In sonda passada ha gnü lö il concert annual da la Società da musica Ftan. Quai es stat il prim grond concert suot la barchetta dal nouv dirigent Martin Stecher. Insemel cullas musicantas e culs musicants ha'l fat ün bel viadi musical tras la Svizra. Dürant tuot il concert sun gnüdas visitadas tuot las regions linguistics. Pella part rumantscha ha la Musica da Ftan preschantà la bella melodia «Viver senza te» dals Furbaz. Impü sun statteda da dudir differents marches dedichadas a citats in Svizra, ün riassunt da melodias da Polo Hofer e – quai chi nu's dascha invlar per ün viadi tras la Svizra – ils tuns da la tüba. Quai per exaimpel cun üna ballada pella tüba, sunada da Fadri Caprez. Il dirigent Martin Stecher ha preschantà insemel cun sias musicantas e seis musicants ün bel concert da prümvaira, adonta cha illa prüma part dal concert as ba-

daiva üna tscherta agitaziun. Uschè ha'l cumanzà duos jadas il viadi respectivmaing il nouv toc avant cha tuot ils musicants d'eiran propcha pronts. Però quai nun ha insomma brich disturbà, ha dafatta far gnir pü simpatica la represchantaziun. E scha pro oters concerts svanisha il cornet in Es illa seguonda part dal concert plütoست ill'anonimità, merita la melodia dad es-cornet, sunada da Jon Pitschen Caprez, gronds lods. El es stat fin a la fin suroura dezaintamaing preschaint ed ha pesserà insemel cul dirigent e tuot las musicantas e musicants per ün bel purtret musical dal viadi tras la Svizra. Cun scannar il code QR as survain ün'impressiun dal concert da la Società da musica Ftan. (nba)

fotografia e video: Nicolo Bass



In sanda passada ho l'Uniun dals Grischs gieü sia radunanza generela a Schlarigna i'l Chesin Manella. fotografia: mad